

# Sekitaran cemerlang perlu terus disedia dorong bakat seperti Hazim,

## PANDANGAN



**ZULAIQAH ABDUL RAHIM**  
zulabr@sph.com.sg

“USIA bukan satu penghalang. Sebaliknya batasan yang anda letakkan pada minda anda itu yang menjadi penghalang.”

Kata-kata daripada salah seorang atlit terhebat dunia dan pemenang tiga pingat emas Olimpik, Jackie Joyner-Kersey, kini bagaikan sudah menjadi mantra dalam bakat sukan muda mencapai kecemerlangan.

Di peringkat serantau, di Sukan SEA, kita telah melihat ramai atlit muda yang muncul juara, mengharumkan nama negara masing-masing.

Singapura juga tidak terkecuali.

Peminat sukan pasti ingat bagaimana Joscelin Yeo memenangi pingat emas di Sukan SEA di Manila, Filipina, pada 1991 pada usia hanya 12 tahun.

Sehingga kini, beliau merupakan pemegang rekod pingat emas terbanyak oleh seorang atlit di Sukan SEA – dengan 40 emas dalam lapan temasya sukan serantau itu.

Setiap Sukan SEA, ramai lagi ‘Joscelin’ yang muncul, termasuk dalam temasya yang sedang berlangsung di Manila sekarang ini.

Minggu lalu, dua atlit muda mengharumkan nama negara.

Muhammad Hazim Mohamad Yusli, 17 tahun, memenangi pingat emas dalam penampilan pertama di Sukan SEA dalam acara tanding Pencak Silat Kelas B.

Atlit lawan pedang negara berusia 19 tahun, Kiria Tikanah Abdul Rahman, pula membawa pulang emas dalam acara epee individu, mengalahkan atlit tuan rumah, sekaligus memenangi pingat emas pertama Singapura dalam sukan itu sejak 1989.

Hazim merupakan pemenang gelaran Atlit Muda Terbaik tahun ini atau *Sportsboy of the Year* dan kemenangannya itu memahat reputasinya sebagai atlit silat muda berpotensi.

Justeru kemenangannya dijangkakan. Namun, dalam pertandingan seperti silat, apa juga boleh berlaku di dalam gelanggang.

Selain persiapan fizikal, atlit muda juga perlu kuat secara mental bagi mengatasi cabaran yang datang semasa pertandingan.

Begitu juga Kiria Tikanah.

Di depan penyokong setempat, yang memberikan sorakan gemuruh kepada setiap mata yang diperolehi atlit mereka, Abella Haniel, Kiria mampu kekal tenang dan akhirnya membawa pulang pingat emas dalam Sukan SEA pertamanya.

Kisah kejayaan seperti yang ditonjolkan Muhammad Hazim dan Kiria Tikanah adalah tujuan temasya sukan serantau itu yang sebenar – iaitu menyediakan wadah bagi atlit-atlit terhebat rantau ini melangkah lebih jauh dan mencapai kejayaan di peringkat Asia atau antarabangsa.

Di Sukan SEA ini, atlit muda kita telah mempamerkan semangat juang.

Mereka telah membuktikan mereka mempunyai potensi melangkah lebih jauh.

Sedang hala tuju mereka dalam bidang sukan masing-masing bergantung pada komitmen, tekad dan kesungguhan mereka sendiri, Singapura perlu terus mewujudkan sekitaran yang menggalak kecemerlangan sukan.

Hanya dengan sekitaran sedemikian kita dapat mendorong bakat seperti Muhammad Hazim dan Kiria Tikanah terus berkembang, memenuhi potensi mereka sepenuhnya dan mencapai kejayaan lebih tinggi lagi.